

Tunngaviusumik atuarfiit namminersortitat angerlarsimaffimmilu atuartaaneq il.il. pillugit Inatsisartut inatsisaata allanngortinnissaa pillugu Inatsisartut inatsisissaattut siunnersuut.

(Tapiissutit naatsorsorneqartarnerat, PPR aamma annertusisamik immikkut atuartitsineq il.il. pillugit kommunip nassuiaataanut tunngatillugu sunniutit allannguutaat)
(Ilinniartitaanermut, Ilisimatusarnermut Nunanullu Avannarlernut suleqateqarnermut Naalakkersuisoq)

Saqqummiussissut

(Ilinniartitaanermut, Ilisimatusarnermut Nunanullu Avannarlernut suleqateqarnermut Naalakkersuisoq)

Siullermeerneqarnera

Matumuuna tunngaviusumik atuarfiit namminersortitat angerlarsimaffimmilu atuartaaneq il.il. pillugit Inatsisartut inatsisaata allanngortinnissaa pillugu Inatsisartut inatsisissaattut siunnersuut Naalakkersuisut sinnerlugit saqqummiutissavara.

Tunngaviusumik atuarfiit namminersortitat angerlarsimaffimmilu atuartaaneq il.il. pillugit Inatsisartut inatsisaat nr. 10, 15. april 2003-meersoq malillugu kommunit tunngaviusumik atuarfinnut namminersortitanut tapiissuteqartarnerat pillugu maleruaqqusat erseqqissuunngitsutut paasineqarnerat aallaavigalugu siunnersuut suliarineqarpoq. Tamatumunnga pissutaavoq, inatsisip atuutilerneraniilli ataatsimoortumik tapiissutit tunniunneqartarnerinut tunngaviit allanngortinneqarsimanerat.

Siunnersuutitigut taamaammat anguniarneqarpoq, ataatsimoortumik tapiissuteqarnissamut piumasaqaatit allanngortinneqaraluartut, inatsisip atuutsinneqalernerani piumasaqaatinut naapertuuttumik tunngaviusumik atuarfiit namminersortitat atuatumut ataatsimut tapiissutisisaannarnissaasa qulakkeerneqarnissaa.

Taamaammat siunnersuutigineqarpoq, aningaasat atuatumut ataatsimut ataatsimoortumik tapiissutissat 2008-mi akinik aningaasarsianillu aaqqiisarnermut assigusut 2013-imi qaffasissusissaattut annertutigisut toqqorneqassasut, tassa siunnersuutip 2013-imi januaarip aallaqqaataani atuutsinneqalernissaata siunnersuutigineqarnera pissutigalugu. Ilutigalugu siunnersuutigineqarpoq, kommuninut ataatsimoortumik tapiissutit aqutigalugit akinik aningaasarsianillu aaqqiisarneq assigalugu siunnersuummi aningaasat pineqartut akinut aningaasarsianullu naleqqussarlugit aaqqinneqartassasut.

Aammattaq perorsaanermut tarnillu pissusaannut tunngatillugu siunnersuisarnerup immikkullu atuartitsisarnerup kommuninit 1. januar 2012-imi tiguneqarnerisa nassataannik allannguuteqartitsinerup kinguneqartinneqarnissaa pisariaqartinneqarpoq.

Kiisalu siunnersuutigineqarpoq, tungaviusumik atuarfinni namminersortitani atuartut
amerlassusaasa ikinnerpaaffilerneqarnissaat pillugu Naalackersuisut
malittarisassaliornissamut piginnaatinneqassasut.

Taamatut oqaaseqarlunga siunnersuut Inatsisartut kajumissuseqarlutik
suliarinnilluarnissaannut ingerlateqqippara.